



Ministère de l'Agriculture, de l'Alimentation et de la Viticulture	8
Référence : 17/2025	
- 9 JAN. 2025	
A traiter par :	
Copie à :	

Här Claude Wiseler
President vun der Chamber

Lëtzebuerg, den 8. Januar 2025


Här President,

Esou wéi den Artikel 80 vum Chambersreglement et virgesäit, biede mir Iech, dës parlamentaresch Fro un d'Madamm Landwirtschaftsministesch an un den Här Ëmweltminister weiderzeleeden.

Viru Kuerzem sinn am Raum Dol zwee doudeg Schof op enger Weed fonnt ginn. Et besteet de Verdacht, datt d'Déiere vun engem Wollef gerass goufen. Dofir si Prouwe vun de Bësswonne fir eng geneetesche Analys an e Speziallabo an Däitschland geschéckt ginn. Den Aktiouns- a Managementsplang fir den Ëmgang mat Wëllef aus dem Joer 2017 gesäit vir, datt den direkte Schued zu 100 Prozent indemniséiert gëtt, wa kloer kann nogewise ginn, datt en op eng Attack vum Wollef zrëckzeféieren ass. Laut dem Plang kënnen och indirekt Schied duerch de Wollef entschiedegt ginn, allerdéngs muss an dem Fall de Geschiedegte selwer beweisen, datt et sech ëm eng Wollefsattack handelt. Am aktuelle Fall sinn duerch d'Panik vun de Schof schwéier Schied an der Wiss entstanen. An dem Zesammenhang wollte mir follgend Froen un d'Madamm Landwirtschaftsministesch an un den Här Ëmweltminister stellen.


- Wat fir direkt Schied gi bei enger Wollefsattack genee kompenséiert?
- Wat fir indirekt Schied duerch de Wollef ginn indemniséiert an zu wat fir engem Taux?
 - Gëtt Evaluatioun vun den indirekte Schied large gehandhaabt, well et direkt Konsequenze vun enger Wollefsattack sinn?
- Wéi vill Schuedensfäll sinn iwwert de Wee vum Wollefsmanagementplang vun 2017 bis elo indemniséiert ginn, a wat fir e Montant ass insgesamt ausbezuelte ginn?
- Plangt d'Regierung, de Wollefsmanagementplang vun 2017 ze aktualiséieren?
- Leien d'Resultater vun der Genanalys scho vir?
 - Wa jo, wat koom bei der Untersuchung eraus, sinn déi zwee Schof vun engem Wollef gerass ginn?

Här President, mir bieten Iech, eisen déifste Respekt unzehuelen.



Jeff Boonen

Deputéierten



Octavie Modert

Deputéiert



**Gemeinsam Äntwert vun der Ministesch fir Landwirtschaft, Ernährung a Wäibau an dem Minister fir
Ëmwelt, Klima a Biodiversitéit op d'parlamentaresch Fro n° 1738 vun den éierewäerten Deputéierten
Jeff Boonen an Octavie Modert**

1. Wat fir direkt Schied gi bei enger Wollefsattack genee kompenséiert?

Am Règlement grand-ducal du 30 août 2023 concernant l'indemnisation des dégâts matériels commis par certaines espèces animales protégées et les subventions pour les mesures préventives y relatives steet Folgendes :

“Art. 4. Indemnisation des dégâts causés aux animaux d'élevage

(1) Le ministre indemnise les dégâts directs causés aux animaux d'élevage qui ont été tués ou blessés par le loup, dans les cas suivants :

1° au cas où le loup est identifié comme l'auteur de la mort respectivement des blessures de l'animal concerné, à hauteur de :

a) 100 pour cent de la valeur vénale de l'animal tué par le loup ou euthanasié à la suite d'une attaque de loup jusqu'à concurrence maximale de 200 % de la valeur vénale moyenne des animaux de cette même catégorie ;

b) 100 pour cent des frais de vétérinaire en relation avec le traitement de l'animal blessé jusqu'à concurrence de la valeur vénale de l'animal.

2° au cas où le loup ne peut pas être exclu comme l'auteur de la mort respectivement des blessures de l'animal concerné, à hauteur de :

a) 75 pour cent de la valeur vénale de l'animal tué par le loup ou euthanasié à la suite d'une attaque de loup jusqu'à concurrence maximale de 200 % de la valeur vénale moyenne des animaux de cette même catégorie ;

b) 75 pour cent des frais de vétérinaire en relation avec le traitement de l'animal blessé jusqu'à concurrence de la valeur vénale de l'animal.”

Déi finanziell Evaluatioun gëtt vun der Administration des services techniques de l'agriculture (ASTA) gemaach, *au cas par cas*.

2. Wat fir indirekt Schied duerch de Wollef ginn indemniséiert an zu wat fir engem Taux ?

De Beräich vun den indirekte Schied ass am Wollefsmanagementplang gereegelt. Dorënner fale beispillsweis Doutgebuerten, Produktiounsausfäll, den Ausbroch vu Béischten oder nach den Opwand fir eng méi schwierig Haltung no engem Wollefsugrëff.

Déi finanziell Evaluatioun gëtt och hei vun der ASTA gemaach, *au cas par cas*.

Déi indirekt Schied ginn zum selwechten Taux indemniséiert wéi am uewe genannten Artikel 4 beschriwwen.

3. Gëtt Evaluatioun vun den indirekte Schied large gehandhaabt, well et direkt Konsequenze vun enger Wollefsattack sinn?

Déi finanziell Evaluatioun gëtt vun der ASTA gemaach, *au cas par cas*, wann ee vun den uewe genannte Fäll agetrueden ass.

4. Wéi vill Schuedensfäll sinn iwwert de Wee vum Wollefsmanagementplang vun 2017 bis elo indemniséiert ginn, a wat fir e Montant ass insgesamt ausbezuelte ginn?

Säit 2017 sinn 7 Fäll indemniséiert ginn, mat engem gesamte Montant vun 7296,86 EUR.

5. Plangt d'Regierung, de Wollefsmanagementplang vun 2017 ze aktualiséieren?

Jo.

6. Leien d'Resultater vun der Genanalys scho vir?

Jo.

7. Wa jo, wat koum bei der Untersuchung eraus, sinn déi zwee Schof vun engem Wollef gerass ginn?

Jo.

Lëtzebuerg, den 10. Februar 2025

(s.) Martine HANSEN

D'Ministesch fir Landwirtschaft, Ernährung a Wäibau